

Da li će Dom naroda Parlamenta Federacije BiH deblokirati put u EU?

Ured visokog predstavnika pozvao je danas delegate Doma naroda Parlamenta Federacije BiH da na sutrašnjoj sjednici usvoje Zakon o Javnom RTV servisu Federacije BiH koji će biti u potpunosti usaglašen sa Zakonom o Javnom RTV sistemu BiH, u obliku u kojem ga je predložila Vlada Federacije BiH. Ukoliko ovakav zakon ne bude usvojen, delegati će biti odgovorni za blokiranje puta Bosne i Hercegovine u Evropu, upozorava OHR.

“Prošlog mjeseca Zastupnički dom Parlamenta Federacije BiH usvojio je izmjene i dopune koje nisu u skladu sa Zakonom o Javnom RTV sistemu, niti sa prijedlogom Vlade Federacije BiH. Ove izmjene i dopune ugrožavaju uređivačku nezavisnost i finansijsku održivost sistema javnog emitovanja u BiH”, izjavio je danas viši zamjenik visokog predstavnika Peter Bas-Backer.

Komesar Evropske unije za proširenje Olli Rehn prošle je sedmice istaknuo kako “Federacija BiH, u cilju završetka pregovora o sporazumu o stabilizaciji i pridruživanju, mora osigurati da njeni zakoni budu u potpunosti usaglašeni sa državnim Zakonom o Javnom RTV sistemu, usvojenim krajem prošle godine.”

“Poruka ne može biti jasnija,” rekao je Bas-Backer. “Ukoliko otvori put ka procesu usklađivanja, koji bi rezultirao usvajanjem zakona usaglašenog sa državnim zakonom, Dom naroda Federacije BiH osigurao bi neometan nastavak pregovora o sporazumu o stabilizaciji i pridruživanju. Ukoliko to ne učini, Dom naroda Parlamenta Federacije BiH bi ugrozio cjelokupnu reformu sistema javnog emitovanja, a time i ispunjenje jednog od ključnih uslova BiH u nastavku procesa

pregovora o sporazumu o stabilizaciji i pridruživanju.”

Viši zamjenik visokog predstavnika Bas-Backer obratiće se Kolegiju Doma naroda Federalnog parlamenta na sutrašnjem sastanku.

Organi vlasti Federacije BiH već tri mjeseca kasne sa ispunjenjem ovog uslova za harmonizaciju.